

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 079530 26 K
Dana:03.04.2026. godine

U IME FEDERACIJE BIH!

Općinski sud u Tešnju, sudija Bekrić Hidajeta, uz sudjelovanje zapisničara Alisa Šabanović u krivičnom predmetu optuženog D. M. zvanu "M." sin S. iz Č. broj ..., općina Tešanj, zbog krivičnog djela "Posjedovanje i omogućavanje uživanja opojnih droga" iz člana 239. stav 3. Krivičnog Zakona Federacije Bosne i Hercegovine, povodom optužnice Kantonalnog tužilaštva Zenica broj T04 0 KT ... 25 od 11.12.2025 godine, nakon održanog pretresa za izricanje krivičnopravne sankcije, u prisutnosti tužitelja Kantonalnog tužilaštva ZE-DO kantona Amra Ahmetlić i optuženog 03.04.2026 donio je sljedeću:

P R E S U D U

Optuženi **M. D.**, zvanu „M.“, sin S. i majke S. rođene H., rođen godine u Slavonskom Brodu, Republika Hrvatska, nastanjen u Tešnju, na adresi Č. broj ..., pismen, sa završenom srednjom školom, po zanimanju tehničar za mehatroniku, razveden, vojsku nije služio, ne vodi se u vojnoj evidenciji, lošeg imovnog stanja, Bošnjak, državljanin BiH, JMB: ..., osuđivan

Kriv je

što je:

dana 11.02.2023. godine, oko 08:40 sati, na području općine Tešanj, u mjestu Jelah, suprotno odredbama člana 4. stav 1., 2, 3. i 5., a u vezi sa odredbom člana 19. i 20. Zakona o sprečavanju i suzbijanju zloupotrebe opojnih droga („Službeni glasnik BiH“ broj: 8/06, 103/08 i 51/11), kod sebe neovlašteno posjedovao proziranu pvc vrećicu sa sadržajem biljne materije, neto mase 3,052 grama, za koju materiju je vještačenjem utvrđeno da sadrži psihoaktivnu supstancu tetrahidrokanabinol (THC) i predstavlja opojnu drogu „Cannabis“, koja je pod rednim brojem 13. liste opojnih droga i rednim brojem 26. liste psihotropnih tvari iz Tablice I „Zabranjene tvari i biljke“ proglašena kao takva, te pvc papir sa sadržajem materije svijetložute boje, neto mase 4,572 grama, za koju materiju je vještačenjem utvrđeno da sadrži psihoaktivnu supstancu amfetamin poznatiju kao opojna droga „Speed“, a koja droga je pod rednim brojem 1. Liste psihotropnih tvari iz tablice II „Tvari i biljke pod strogim nadzorom“ proglašena takvom, iako je bio svjestan i znao da se radi o opojnim drogama, što je i htio, koja opojna droga mu je oduzeta prilikom kontrole i pregleda lica od strane ovlaštenih službenih osoba PS Tešanj,

dakle, neovlašteno posjedovao opojnu drogu,

čime je počinio krivično djelo Posjedovanje i omogućavanje uživanja opojnih droga iz člana 239. stav 3. Krivičnog Zakona Federacije Bosne i Hercegovine, pa se na osnovu istih zakonskih odredaba i odredaba člana 43. i 49. Krivičnog zakona Federacije Bosne i Hercegovine

OSUDUJE

na kaznu zatvora u trajanju od 3 (tri) mjeseca

Optuženi se oslobađa na plaćanje troškova krivičnog postupka i isti spadaju na teret budžetskih sredstava suda.

U smislu odredaba člana 78. i 239.stav 4.Krivičnog zakona Federacije BiH optuženom se izriče mjera sigurnosti oduzimanja predmeta i privremeno opojna droga „kanabis“ neto mase 3,052 grama i opojna droga Speed 4,572 grama trajno se oduzima a količina preostala nakon vještačenja (3,022 grama i 4,533 grama) ima se uništiti.

Naređuje se Komisiji za uništenje opojne droge formirane pri Vijeću Ministara BiH da odmah po prijemu naloga za izvršenje mjere sigurnosti a najdalje u roku od mjesec dana od PU IV PS Tešanj oduzme navedenu opojnu drogu preostalu nakon izvršenog vještačenja, te istu uništi u skladu sa Pravilnikom o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekusora.

O b r a z l o ž e n j e

Kantonalno tužilaštvo ZE-DO kantona Zenica optužnicom T04 0 KT ... 25 od 11.12.2025. godine optužilo je D. M. zbog krivičnog djela “Posjedovanje i omogućavanje uživanja opojnih droga” iz člana 239. stav 3. Krivičnog Zakona Federacije Bosne I Hercegovine, počinjenog na način, vrijeme i mjesto kako je to pobliže opisano u optužnici, temeljeći optužbu na dokazima koji su predloženi u optužnici

Sudija za prethodno saslušanje ovog suda potvrdio je navedenu optužnicu dana 15.12.2025. godine.

Na ročištu za izjašnjenje o krivnji optuženi, nakon što je u smislu odredaba člana 13. ZKP-a, poučen o svojim pravima, izjavio je da je izvršio radnje na način i vrijeme kako je to opisano u dispozitivu ove optužnice, da je izvršio predmetno krivično djelo i da priznaje krivnju.

Nakon razmatranja izjave o priznanju krivnje uvjerenje suda je da je do priznanja krivnje došlo dobrovoljno, sa razumijevanjem da je optuženi svjestan svih posljedica i obaveza koje proističu iz priznanja krivnje te da postoji dovoljno dokaza o krivnji optuženog, pa je sud i prihvatio izjavu o priznanju krivnje.,

Sud je izvršio uvid u materijalne dokaze prikupljene tokom istrage, i to: Zapisnik o uviđaju PS Tešanj broj: ... od 11.02.2023. godine, Potvrdu o privremenom oduzimanju predmeta PS Tešanj broj: ... od 11.02.2023. godine na ime M. D., Zapisnik o izvršenoj radnji privremenog oduzimanja predmeta i popisu privremeno oduzetih predmeta PS Tešanj broj: ... od 11.02.2023. godine, Odobrenje Kantonalno tužiteljstvo ZDK Zenica broj: T04 0 KTA ... 23 od 16.02.2023. godine, Naredbu za vještačenje Kantonalno tužiteljstvo ZDK Zenica broj: T04 0 KTA ... 23 od 16.02.2023. godine, Zapisnik o otvaranju i pregledu privremeno oduzetih predmeta i dokumentacije PS Tešanj broj: ... od 13.11.2023. godine, Fotodokumentaciju PS Tešanj broj: ... od 11.02.2023. godine (datum izrade: decembar 2024. godine), Izvod iz kaznene evidencije PS Tesanj broj... od 03.04.2026 godine, pa je sud cijeneći izvedene dokaze pojedinačnoj i njihovoj međusobnoj vezi utvrdio da je optuženi počinio radnje opisane u dispozitivu ove presude odnosno da je neovlašteno posjedovao jednu pvc vrećicu sa sadržajem biljne materije, za koju materiju vještačenjem je utvrđeno da sadrži psihoaktivnu komponentu tetrahirdokanabinol (THC) i predstavlja opojnu drogu kanabis, te jedan pvc papir sa sadržajem materije svijetložute boje neto mase 4,572 grama, za koju materiju vještačenjem je utvrđeno da sadrži psihoaktivnu supstancu amfetamin, poznatiju kao opojna droga

speed, koje se nalaze na popisu opojnih droga, te da je bio svjestan svog djela i htio njegovo izvršenje.

Budući da je odredbom člana 3. tačka 1. Zakona o sprečavanju i suzbijanju zloupotrebe opojnih droga (Sl. Glasnik BiH br. 8 od 07.02.2006. godine) propisano da je opojna droga svaka tvar prirodnog ili umjetnog porijekla koja je uvrštena u popis opojnih droga u skladu s međunarodnim konvencijama o nadzoru nad opojnim drogama ili na temelju odluke nadležnih tijela u Bosni i Hercegovini, a da su odredbom člana 4. istog Zakona propisane opće zabrane, odnosno da je posjedovanje opojnih droga i psihotropnih supstanci dozvoljeno samo u medicinske, veterinarske i naučne svrhe, te pošto je utvrđeno da biljni materijal koji je pronađen kod optuženog sadrži psihoaktivne komponente „Cannabis“ i „Tetrahidrokanabinol“ (THC) i amfetamin koje se nalaze na popisu opojnih droga psihotropnih tvari biljaka iz kojih se može dobiti opojna droga i prekusura, to je optuženi i postupao suprotno odredbama člana 4. i 19. i 20. Zakona o sprečavanju i suzbijanju zloupotrebe opojnih droga, jer je neovlašteno posjedovao opojnu drogu.

Kako krivično djelo „Posjedovanje i omogućavanje uživanja opojnih droga“ iz člana 239. stav 3. KZ F BiH čini onaj ko neovlašteno posjeduje opojnu drogu, a uračunljivost optuženog nije ničim dovedena u pitanje, to se u radnjama optuženog stiču sva bitna obilježja krivičnog djela „Posjedovanje i omogućavanje uživanja opojnih droga“ iz člana 239. stav 3. KZ F BiH, pa kako je optuženi bio svjestan svog djela i htio njegovo izvršenje, to je sud optuženog oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije, sud je cijenio na strani optuženog sve okolnosti koje su od značaja za odmjerenje kazne. Od olakšavajućih okolnosti sud je našao da optuženi priznaje izvršenje djela koje mu se stavlja na teret, da je mlad, da pokazuje iskreno kajanje, a od otežavajućih okolnosti da je osuđivan, i to tri puta od čega dva puta uvjetnom osudom i jedno kaznom zatvora pa je optuženog i osudio na kaznu zatvora u trajanju od 3 mjeseca, jer je uvjerenje suda da se svrha kažnjavanja može postići samo bezuvjetnom kaznom zatvora jer se radi o specijalnom povratniku u vršenju krivičnih djela.

U smislu odredaba člana 78. i 239. stav 4. Krivičnog zakona Federacije BiH optuženom se izriče mjera sigurnosti oduzimanja predmeta i privremeno opojna droga „kanabis“ neto mase 3,052 grama i opojna droga speed 4,572 grama trajno se oduzima a količina preostala nakon vještačenja (3,022 grama i 4,533 grama) ima se uništiti. , te se naređuje Komisiji za uništenje opojne droge formirane pri Vijeću Ministara BiH da odmah po prijemu naloga za izvršenje mjere sigurnosti a najdalje u roku od mjesec dana od PU IV PS Tešanj oduzme navedenu opojnu drogu preostalu nakon izvršenog vještačenja, te istu uništi u skladu sa Pravilnikom o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekursora.

Optuženi se oslobađa na plaćanje troškova krivičnog postupka i isti spadaju na teret budžetskih sredstava suda.

PRAVNA POUKA:

Protiv ove presude dozvoljena je žalba Kantonalnom sudu u Zenici u roku od 15 dana od dana prijema presude.

SUDIJA

Bekrić Hidajeta